

巢

經

巢

詩

集

巢經巢詩集卷第三

遵義 鄭 珍 子尹

古今詩共七十首

渡桶口

門前溪水如奔馬流入烏江到此津我向津頭問江水
朝來應見白頭人

安化道中

崎嶇安化道甚似歷蠶叢天半負棉白人頭懸石紅竿
船筒米飯販運道思銅者率以肩戴所以戴之具曰竿船杉僻牯牛風山中風發店壁
爲破俗謂牯牛風漸起殊鄉歎艱塗况未窮

身系身言自卷三
一
偏崖

未到偏崖時心欲尋別路既過偏崖時行行屢回顧

曉登銅崖

一百八灘經過盡披衣曉起踏銅崖雙江一碧渺然去
孤嶼中流無限佳水氣昏昏迷雉堞人煙穰穰鬪魚鮓
山川自古征蠻地博得登臨寫壯懷

銅仁江舟中雜詩六首

江行無百里江景已多更問地難爲字經灘不計名敗
牀眠白鯉疎塢出黃橙欲識銅仁近奇山滿眼生

漸見寒流闊居人兩岸分潭光清漏石山影綠搖雲漁

得沙頭訊炊香柁尾聞向來風味熟惆悵但離羣
銅舟三日慣快若鳥輕鈔詩待灘平寫書緣境勝拋生
薪常失飪寒菜旋充庖道里時相問黔荆路已交
蛟龍非獲罪風水自無猜朝夢同炊熟晨舟隔縣開江
鳴知雨到鳴語覺邨來半起先勞謝閒鷗候岸隈
爛石通絳路荒塘落堦泥潮收沙露尾槩過水生臍魚
翠閒閒立鵝青閃閃低勞生慚對汝方憶漆園妻
景色辰陽變風煙夢澤通山平趨落地江遠欲吞空曠
岸一庵白晴砧雙婦紅狂歌仍入楚陳爪歎泥鴻

明月池寄鄧湘皋

顯鶴

詩老

鄧子詩才妙天下不見風流今幾年
長沙日落渺何處繫馬堂階應醉眠
明月池頭苦相望孤舟江上但寒煙
得書儻遇長安使折取梅花寄歲前

武陵燒書歎

并序

十二月朔泊桃源夜半舢破水沒半船
翌抵武陵啟箱篋皆透漬烘書三晝夜
凡前所鈔述者或燒或焦半成殘稿爲之浩歎

烘書之情何所似有如老翁撫病子心知元氣不可復
但求無死斯足矣書燒之時又何其有如慈父怒啼兒
恨死擲去不回顧徐徐復自摩撫之此情自癡還自笑

心血既乾轉煩惱上壽八十能幾何爲爾所累何其多
公安

可哭公安縣沉災竟四年萬家何處去諸賦暫時蠲魚
鼈蟠廬墓舟筒當土田更堪聞邑長歲剩百千緡

松滋

松滋前決口聞尙駐工官四載已云久一隄如此難春
江甯禁漲遺戶得無殫寄語修防吏盤飡爾固安

傷歌行二首襄城除日作

男兒生世閒窮達有命不自由黃金便使高北斗能衣
晏子幾狐裘拂塵下馬卸馬鞍舉盃自勸歌路難路誠

難莫復怪故山兒女豈不佳
斲雪斫冰君自愛

一夕復一夕一朝復一朝
朝夕遞相送歲盡何必在今
宵噫乎歲如江上之波我如中流之石
抵盪磨來波去浪渺無盡石行泐矣
當奈何酒盃融融吾畱六龍六龍
不畱我心苦夜半高歌淚如雨

元旦石固

巳下乙未

大駮南畔午停舟小澗東頭步寫憂
並路牽衣兒有母望鄉遮眼樹無
讎銀旛士女王正月落日河山古
豫州孤迴天涯正悽絕誰家歲盞
擁高樓

人日度滎澤口

黃流滾滾自天來夜斬層冰曉楫催廣武山頭初日上
大梁城北亂雲開親心逐子前年度遊轍何時此濟回
多謝河公好看客安瀾空望古今才

邯鄲

盡說邯鄲歌舞場客車停處草遮牆少年老去才人嫁
獨對春城看夕陽

湯陰謁岳祠

蕩陰城東喬木寒下馬岳祠瞻表桓悵望公生一酒淚
蕭條雨歇獨憑欄長城道濟才無媿異姓汾陽福竟難
更苦西鄰有冤聖請歌文操慰忠肝

經嵇侍中祠

碧血飄零雲鳥悲
雪中憑軾弔荒祠
似聞叔夜冤魂語
不及王儀尙有兒

望蘇門懷孫鍾元先生

積雪高寒見夏峰
百泉知傍草堂松
鸞皇嘯斷無消息
誰念塗窮哭嗣宗

謁比干墓

墓禽知敬久無音
樵採含悽遠不侵
氣共微箕存祖社
魂傷姬孔表岡林
千秋死諫無公酷
半日句留望古溪
壟畔請攜卷石去
按閒時見昔年心

一石與心絕
肖持以歸

南陽道中

先車雨過塵方少未夏邨明望不遮林脚天光如野水
麥頭風燄度晴沙春當上已猶無燕地近南都漸有花
晝睡十分今減半爲畱雙眼對芳華

宿潁橋

我行古潁谷慨懷潁封人當日君臣直兒戲許以純孝
殊不倫鄭莊能使祭足謝中肩豈有見生母必欲及黃
泉人臣格非有正道教君遂過烏得賢寤生旣不孝考
叔復不忠不忠遺母羹不孝將毋同

三月初十沙洋

漢水東南流奔浪日夜急機舟感今日吾年倏三十兒
女齊送我老路從此入精力更幾何前去正難執且樂
現前得買酒沙洋集

自沙洋步至黃家林就舟二十里邨景佳絕

欲就東湖船先舍漢津漿隔岸知境異越隄果幽爽春
草碧淺淺新樹團益益鳩鳴宿雨餘人耕舊墟上秀圃
蔥薤花小橋沒菰蔣麥深不見人時聞輓車響傍道多
草舍老翁聚三兩偶憩知餽茗味惡誠足享北來厭塵
沙茲景勞夢想緩步殊未久舟已叢芮榜清謠煙水閒
餘歡獨攜往

網籬行 并序

公安五年水民食於漁而居稍高地其種菜卽以
敗網爲籬亦奇觀也

公安民田入水底不生五穀生魚子居人結網作耒耜
耕水得魚如得米高田魚落田反蕪生魚之地變生蔬
網亦從之變其用環蔥繞芥如圍魚以蔬佐魚生已蹙
以網作籬還詫曰苟且窮算得新創何遽絲乃不如竹
蔬花蔟蔟蔬葉披貓戲網中雞隔窺想見鷓鴣與獮獮
出入籬際驅魚時不愁網破籬無補但懼水反魚游圃
此時籬倒蔬亦無頓頓餐魚奈何許

已過武陵

記我出都門榆柳未知春行得山水綠望家如隔鄰隔鄰未卽到人情覺已親匪獨人情親我亦愛我身萬里雖無功生存還二人風水見憐我雲日亦相因監沅已去眼幾日銅江濱在遠止知歸家近始念貧預愁小兒女不解諒苦辛入門索包裹惻惻傷吾仁

望鄉吟

一灘高五尺十灘高五丈行盡銅溪四百灘銅厓應當白雲上厓上還有千萬山一重高出一重顛待到銅厓望鄉國始似從此看雲閉山高如梯水如箭到家早晚

櫻桃綻心隨飛鳥去悠悠白髮紅綳眼中見萬里眞成一夢游茗山重認雨中舟桐花落盡春風老杜宇催人
聖白頭

辰溪縣北三十里許水東岸皆峭壁猿鳥所不到其上有樓閣闌楯箱匣之屬曰僊人巖其石斑如狗迹者曰狗足巖其西岸蒼厓界白蜿蜒斜上如龍狀者曰白龍巖俱奇譎可翫舟行經此戲爲之詩

神僊夔樓居亦復喜峭僻辰陽山水窟上古斲人跡僊者忘其名於此結靈宅下映百丈潭上接千仞壁朝服

砂五色暮食菲三脊潭中白龍子時時受餘液不知幾
千載僊眷有分析廣構嵌穴閒幾至無剩隙此時盤瓠
氏子孫正昌熾名山出帝賜荒巖任游息一朝驚見人
奔赴急欲辭泗水不沒鼻踏厓如履席亂去汗石花吠
聲入空碧僊者謂行乎羣犬勢已逼寶劍不及攜丹經
不及匿舉室盡飛昇諸物弃狼籍白龍起相從猝上誤
觸石尺木爲所傷乾死挂嶄崩元精死不泯一線透巖
石君看斗壁上遺跡尙歷歷漫衍作歌詩因之寄桑廊

雪中度吳橋至郡巖

止覺百無路來循夫子牆問門迷入徑冒雪立平岡流

水去不息此身行若忘
譙樓鐙火見獨自下蒼茫

晨出樂蒙冒雪至那次東坡江上值雪詩韻寄

唐生

樂蒙城下碑負龜破曉捫讀了不知凍雨濛濛苦無笠
半日撲面風逆吹近午雪作如撒粟頃刻集徧眉與髭
枯林沙蠶餐葉淺水索索冰溜澌田家盡爲二麥喜
大澤可堪行者危里程詫見幾新墮亦有僵倒命若絲
行商早宿釋荷擔野店閉門無所爲最有移民可憐愍
十五五相攜持涕垂入口不得拭齒牙癢痺風戰肌
壯男忍負頭上女少婦就乳擔中兒老翁病嫗呻且走

欲至他國知何時爾守爾令甯見此深堂密室方垂幃
羊羔酒香紫駝熟房中美人爭獻姿鹽絮尖又自矜飾
親諛幕贊紛淋漓樂者自樂苦自苦何由畫此陳丹墀
我今凍餒亦交迫破帽遮首單衣披臘盡不歸飽妻子
荒山足藺愁奔馳平生大言不自赧豈料皆成無當卮
入城耿耿卧不寐民生家計愁心隨唐生卧雪祗不見
見我此吟當和之

追寄莫五北上

重安江前雪映天知君此時到其閒兩夫舁之擔一肩
荒荒瑟瑟山復山子行十日我西還播城雪夜雨似綿

以吾念子衣枕寒知子於吾亦懸懸人事乖迕堪浩歎
隔六十里乃天淵舊約送子意頗解旣去矣復從何言
少年科第世俗便一日聲名即聖賢子兮織錦古斑斑
媚世復解渚牡丹又始弱冠誰不妍金門玉堂無子艱
念我才具未老堅論獻遠媿鼂賈班折腰屈膝又所難
自計豈能事上官雖云汝墳迫周磐密縫之心亦可憐
取彼償此心已酸況又未操必得權吾以此乃今閉關
縱有貴命甯弃捐父母俱存兄弟全癡兒問字妻紡棉
詎免身勞心以安但無遠別吾終焉子今偕計趨春官
歷鍊駿骨閱山川河聲嶽色浩漫漫吞納胸中同鬱盤

獨慨宿學近頗慳罕聚輦轂散若煙阮芸臺程春海二老海
內觀子往謁之間淵源必有告子乎勉旃高堂雖老健
加餐長昆弱弟善承顏及茲餘暉快著鞭木天固有君
舊瓊然止藉此爲親歡得意慎勿受所牽明年馳傳歸
白田阿爺攜子笑欲顛阿孃撫子衣錦鮮孺人見子屏
風邊我從山中繫行纏秋堂與子對牀眠聽子聞見勝
今年作詩一笑隨風傳

適滇卻寄子行

軒

子俞

珏

兩弟

已下丙申

冠雞非難得惟獨乃鍾變踽踽白兔子吾思何能貸日
者昔語我子限一星帶看來兩不育此語信著蔡念我

門祚薄麟鳳非所載或者瘠土中獨苗可望大今來不
吾教渠毋料能代但恐性一傷稍大便難差端須提宗
印使之自小佩上稱宣尼說下稱程朱話

白水瀑布

斷巖千尺無去處銀河欲轉上天去水仙大笑且莫莫
恰好借渠寫吾樂九龍浴佛雪照天五劍挂壁霜冰去聲

山美人乳花玉胸滑神女佩帶珠囊翻文章之妙避直
露自半以下成霏煙銀虹墮影飲祺壑天馬無聲下神
淵沫塵破散湯沸鼎潭口蕩漾金鎔盤白水瀑布信奇
絕占斲黔中山水窟世無蘇李兩謫仙江月海風誰解

說春風吹上觀瀑亭高巖深谷恍曾經手挹清泠洗凡耳所不同心如白水

自郎岱宿毛口

晨登打鐵關下見拉幫塘行至拉幫見拉當虛空鳥道四里強路若僻挂百盤腸人行如狗盡日忙落日盤江出脚底仰視早行鼻尖耳我投旅宿憊欲死擔丁昇夫更何似把盃大笑何所圖下山且爾歸何如山妻徒憶知得無

自毛口宿花壩

盤江在枕下伸脚欲踏河塘堠

毛口對岸卽河塘湖曉流渡江至之已十里

聞花堦子規啼暮踏花堦日已瘦問君道近行何遲道
果非遠我非遲君試親行當自知此道如讀昌黎之文
少陵詩眼著一句見一句未來都非夷所思雲木相連
到忽斲初在眼前行轉遠當年止求徑路通問殺行人
渠不管忽思怒馬驅中州一目千里恣所游安得便馳
道挺挺大柳行邊飯蔥餅荒山惜此江湖影

游清溪洞書石上二首

欲問老回今昔綠碧霄如夢夢如煙麻姑已嫁方平老
知住華陽更幾年

洞門久堊松陰迴溪水自流花自開儻便得歸便歸去

不須定待鶴飛來

平夷生

今年歲丙申今日月初十年是母生年日是我生日我
年已三十母壽六十一母老兒亦老兒悲何由說半世
求祿心甘爲古人拙負母一生力枯我十年血維母天
地眼責命不責術但母得如此又敢自暇逸千秋非所
知兒死此事畢

之卑浙廠道中

白裕衣當暖翠侵紅泥路入箐雲深松秧徧地生如草
石炭隨山有當林蠶豆香濃非故國馬頭春暮動歸心

愁看落日停鞭處
晚飯妻兒語樹陰

月夜誦山谷江湖吞天之作感次其韻

磨骨養腸胃
賣舌攤唇口
俯仰同桔槔
机肉隨薄厚
計來真自苦
誰逼君浪走上
牀無錦褥
下腹孰羔韭
身世一窮了
何者更掣肘
挽哇羹淖糜
縉澤貫楊柳
夕偃心太平
朝游大垂手
怡聲問翁媪
正色對親友
陶公亦後覺
持身易五斗
安知公田秫
中有惡獅吼
靜念發溪省
窗月正相守
欲持山谷詩
歸謀東坡婦
衣食端須幾
百詠當飲酒

端午念阿朶

入戶桃陰夕照移久看蒲糲念嬌兒魯論半部應成誦
渠母前朝早任嬉嫩綠胡孫高蹋臂雄黃王字大通眉
鄉俗綴五色猴猴於兒肩上謂可稀痘以雄黃畫兒頭面謂辟疥云鳳仙籬側瓜棚畔料
爾行吟新寄詩

讀日知錄

顧公宰相才老得忠孝名以言救天下不期當時行大
運自秦來治具幾紛更元元萬古胸利病如列星傳來
二百年考資丐儒生或非著書意掩卷三涕零

自霑益出宣威入東川

出衙更似居衙苦愁事堪當異事徵逢樹便停郵便宿

與牛同寢豕同興昨宵蚤會今宵蚤前路蠅迎後路蠅
任謝東坡渡東海東川若到看公能

山行

路出盤江所濫觴萬山無主夕陽荒肩輿冷瘦尋邨遠
石氣青紅過雨涼國陋翻宜叢檜大路難方覺苦菽香
窮塗未倦平生意欲採閒花種夜郎

經行一路皆地廣大而民稀且窮官斯土者自
中原來對此荒荒靡不愁鬱期滿秩遷去將終
不能富庶也慨然賦此

日南九郡弃非圖滇土何堪任曠蕪龍亦有家思豢御

豬皆名海占膏腴

豬蓄水也

但看插檜俱成樹何不宜桑獨

少襦寄語邦君身已到未應愁歎了官租

者海鉛廠三首

我何適茲土忽忽忘其方如入裸人國舊游文士場奇
懷想不到異俗窮堪傷久對翻疑夢羣山墮渺茫

無斯煎煨利鬼亦掉頭還墨井人聲底爐場夕照閒百
年無樹影畧皺是灰山誰識荒荒頂飛鴻爪自閒

甯甯邊爐宿煤丁倚石炊妻兒閒待養喬罐死猶隨

鉛

以喬計二罐爲一喬罐以鐵爲之長二尺許死者多以廢罐砌墓視之如蜂房然

物力祗斯數

生涯能幾時年年南北運不見窮山悲

嶽山晚望

天青涼涼山暮環餘映未盡血殷殷碧雲四合曠無底
白鳥一雙歸正閒雪嶺寒光蕩東爨夜郎遠影連西巒
荒岡挿脚竟何事風土歲時俱可還

送黎子元愷舅自平夷歸里

送公遠至雙穗橋

在城東

白雲不動心飄搖仰天揮手一

長歎萬山無語風蕭蕭時難不作十全計要公歸家相
料理我甯飢餓不出門若負此心有如水

中秋飲韓仲山錫學博官舍

韓博士家多美竹孔宣公宅有高樓荒城勝賞無他去

此夕清狂可自由，著我樓頭看皓月。借君竹下過中秋，
銜盃却憶巴陵夜。一點團山萬里愁。

寄荅莫五

南北二萬里，得歸便可喜。止當看山來，名心淡如洗。君
才不一世，君心有竊比。水母目濛濛，焉識長鯨事。何必
說高言，不入里人耳。自非此病藥，固讓洩勃使。且吾觀
古賢，誰能不跛。翫金待百鍊，柔木要九枸。美安知屢摧，
挫學問不在此。邇來吳橋上，樞塵光玳玳。左對而右弄，
弟妹繞肩背。朝會小齋食，夜溫北堂被。閒來擁寒氈，鉛
槩伴鍼黹。富貴誠無權，茲豈不足恃。俗兒那可道，追羶

若奔蟻神血先未凝尸蟲食其髓可憐負當年贏作昏
昏鬼念此聳毛骨百年固無幾父母七尺軀責備塞天
地區區一科目真不與榮靡我今老復懶貧賤不自耻
瀾浪適平夷半載絆鹽米叔夜本無蝨把搔不自巳數
月斲家書鄉夢亂難理未識今年秋溪田有收否又未
識家人御冬作何計阿耶出門時論語讀數紙至今知
所誦曾否到孟子悠悠我之思腸中轉輪似如何接君
書亦復窮爾爾下無縫袴襦上無奉甘旨吾儕儻定窮
理也奈何彼子貧且在家我貧更客裏客裏貧轉甚春
衣今未禡日夕數來店弟輩默以俛擬得一個來茲事

有人庀依然滿篋書隨渡烏盤水攜手慰離索一笑愁
城圯翻甕飽黃齋冷尋紅葉寺更當出秘籍共讀梅花
底

平夷驛馬祖祠下柏將圯矣命伐之其擁樹諸
石不忍他弃遂移作假山於祠後庭

平生變石心惟有石始知兩脚踏荒城苔岑悲索離誰
謂補天具日見乃忽之含笑抱之進馬卒俱暗嗤世有
非常原固無怪汝疑茶夫小兒手指意任所爲妙在不
經心遂與巖壑期峰巒有重複嵌竇亦生姿果然慙所
欲百繞未覺疲誰爲後來者聊樂某在斯

游玉真觀

道人門內四立壁道人門外三朶花門前卽是北歸路
何因游子不思家

八日嵩明道中二首

已下丁酉

果園河口牛肝峭看到楊林無限情客去門牛齧草送
女歸籬樹帶花迎

茜紅袖袂雪白巾拜年女兒嬌上春楊林海邊滿花樹
土主山頭皆醉人

次楊林晚望

山頭日白氣荒迷曠望溝塍盡大隄馬過一風擡路去

春歸七日辦花齊衣冠蒙部新年裏煙樹嵩明小海西

莫問舊時翻震事萬頭赤子爛如泥

謂癸巳七月地震奇災

望昆明

昆池一望渺煙波歎息蟲沙百戰過七姓氣銷明傅沐
九真雲擁漢山河蒼蒼檣木烏盤路黯黯阿奴吐嚕歌
金影碧儀消蕩盡太平春事荷鋤多

歸化寺看山茶

小花團團火齊珠大花軒軒紅盤盃高花燒天天爲枯
低花照地地爲朱丹霞大帝御花國氣象想見唐與虞
沐日浴月爛百寶春風沖融元氣麤蕩蕩海天照金碧

山門檜柏排千夫我來看花適正月更有小妹相攜扶
眼迷不認一切佛興熱欲返巢經廬口談樹高向毋贊
指形花大爲毋媿但恐此景未親見鹵莽而言終謂誣
題花要令現紙上正爲此花天下無吁嗟此花天下無

過紫雲庵看梅

雲南梅花不值錢成林乃在紫雲庵暮到滇城朝即揆
美人在林真不諳當關一枝兀放入鵲不及報呼之三
簪斜鬟墜盡驚起乍見情踈如有慚同是縻服亂頭性
氣味一親神已酣興濃不覺對花歎我本無事須來南
止爲君等挂人意不一粗省心不甘句留計止十日事

看山願了回歸驂路長人老那再到便此捨去情何堪
明須更謁老梅祖愁心先過黑龍潭

遂過圓通寺登補陀巖

熏香梅花林往聽海潮音大士無語印以心補陀山高
海深深登高臨風望鄉國似到蓬萊方壺之絕壁忽訝
何時身已仙老親稚子拋不得失聲一呼落羽翼胡僧
在旁俯長眉知我多情不可醫笑指海天認歸鶴雲白
山青無盡時

汎昆明池至近華浦登大觀樓

雲南正月半楊柳青滿湖浮舟出郡郭迢然如畫圖汪

汪千頃波晴沙暢平鋪和風弄舞燕微濶漾浮鳧赤脚
兩槳女妙稱檣散徒踏舷唱小海浩氣凌八區沐氏舊
西園宛在似蓬壺早樹發初綠粉牆明精廬諸漁集門
曲幽清無鳥呼何人構層樓倒映水府居憑闌縱周眺
心目乃以舒羣山從北來柘城煙有無九十九水竇足
鋪十萬夫夕陽轉西山巖觀正糲糊何處昆陽州風帆
盡南趨俯仰一盃酒襟懷千載餘霸業垂掃盡蒼茫畱
此瀟海風逆黃鶴思便朝清都弟妹各牽衣白雲不可
呼長嘯動歸橈月上東城隅

二月初八日攜舅家弟妹重上大觀樓

纔知天以病句留要令重來登此樓明日板橋燈影下
海天如夢水悠悠

宿普定却寄雪樓舅新平四首

蠕蠕此毛骨靜念夫爲誰若無異乎物於彼何等差蟠
桃有美質千載誰與期力不及子孫聊謀一日炊
少小諸兒中舅氏謂可語耕種亟失時厥咎甯在雨感
公父母心猶念媒此女久無飛鳴想麩氈况能舞

一載平夷城兩石平夷穀刷龜不成瓊懸鱸呼樹木

時

遵義掌院歸念公更南去老別情舐犢勢固難相從何時當

來復

抱癰不忍割全外而潰裏我觀麒楨場似無一足恃萬
鍼事履底落地即汙滓明月四更頭私心欲如此

巢經巢詩集卷第三

巢經巢詩集卷第四

遵義 鄭珍 子尹

古今詩共五十七首

次韻和郡守平樾峰翰懷陳省庵玉璧劉研莊

詔陞兩前守

貴仕無令名不如不尊顯
文官祇羨錢不如爲牧翦朝
廷用書生亦曰其言善
豈其所讀書到官即收卷
治法止兩端世有幾人闡
甚或剔刻之傷我枝蹄
趺窅乎頌德碑盍不刻
稍淺陳劉兩郡守是誠循
吏選選陬井校中鼓衆走
且喘一滴父母心百年尙
神緬劉公實儒者

教不薄窮褊至今多能文皆公爲梯棧陳公山繭法此
日更餘衍衣食到傭丐金珠滿原嘯大府近請祀於陳
極黽勉我惟此二公並當銘鐘銑劉父陳也毋教養惠
無辨可念在當時肫摯忘軒冕湘川與白田車或日再
轉陳公始教蠶於白田壩
劉公始闢湘川書院此風遂難得未免重絲繭堂
堂平大夫繼畝思舊畎長言發嗟詠此意更加腆世有
明練材囊愴而卷鬻寸善將自私誰肯道前典觀公用
意處已足見敷展後來今視昔過之不獨踐企風觀化
成歌德我何覲

樾峰次前韻見贈兼商輯郡志奉荅

男兒生世閒當以勲業顯埋頭事章句小夫已翦翦何
况誇文詞更卑無可善居常每念此心若波濤卷百年
大槩見素志未必闕馳車浪奔走日中請息趺獨立天
南頭山高水以淺手攀青松林下瞰兵部選有力誠如
犖頗惜氣稍喘遙遙千載心望古神一緬英雄撒手盡
天地頓爲褊洒淚歎當年終老乘舡棧於飯或未豐道
乃因之衍孔孟日麗天豈不照荒巘以茲頗自信十駕
竭駑勉與公數回見謂我金中銑人實不易知葢棺始
足辨飾詡太寬恕譬如卯也冕安知定慧光不受剛風
轉顧身如晚蠶未知作何繭獨思有此邦昧昧古疆畎

公能念圖志山川感嘉腆此雖百和羹成味非一臠父
母苟作文子弟爭繙典地高聲易呼袖長舞方展請遂
導先路茲事有人踐我懷崔慰祖事事皆媿覩

郡署八景次劉研莊前守原韻

軒窗聽鶯

舊識聽鶯處紅窗綠樹閒官無畱宿諾鳥與話春山昏
曉一澄堊鍼砭解破顏固知善爲政物亦共心閒

山房畱月

月出碧山靜太虛雲盡回閒房不寂寞幽影共徘徊夜
好得無客琴餘堪續盃當關慎看戶莫放五更來

橘井飲泉

古蟄臨高橘清於曉露酣祝之歌洞酌流出當分甘可
減長公調甯懷吳隱慚貞枝耐霜雪長此蔭澄涵

荷池疏雨

亭池不在外邛壑願無違六月此澄暑一天涼浸衣况
兼荷氣滿更聽雨聲稀聖洗妙明藏蜻蜓都忘歸

虛堂接翠

青山入官府偃蹇高人風羣揖此堂上終朝雲氣中左
招到詩板右攬著書叢落落一峰傲高寒森玉蔥

傑閣來青

傑閣憑虛插登臨思邈然萬山浮軟翠雙鳥帶遙天湖
海酒腸兀滄洲吟興懸花源雞犬近曖曖隱蔥谿

古槐臥蔭

何年植斯樹意本取懷人與世留清蔭逃虛臥古春藤
輪貪樾美瘦枕得涼新擾擾勞生夢槐宮此悟真

叢竹浮煙

繞脚森頭玉垂暉仰母慈柔柔多好色靄靄護新枝煙
重梢逾亞陰攢月到遲因君樂晨夕爲報素心知

文待詔鳳兮硯歌

并序

硯背銘云紫霞發彩潤涵玉暉鳳兮鳳兮將望寥

廓而高飛後識嘉靖甲寅二月玉磬山房製徵明
銘蓋待詔八十四歲時刻也後歸陳文恭相國其
元孫際昌令桐梓以貽遵義守平公翰余因爲作
歌時方以長生無極瓦當試莫五餉墨故及之

郎州太守得片石云是停雲館主鳳兮硯文家舊物三
百年歎息遺珍眼中見我聞二十七硯在當時並寵爭
妍皆異姿曾孫眼枯元血碧鳳兮飄搖何處歸培遠堂
中賴有居亭主太平經國資贊輔大勝先生思想帖出
門即受鈴山汗待詔有唐摹右軍
思想帖後歸嚴氏景曜流暉嗟命貧至
今老衲寫梵文待詔流暉硯今
爲浙僧某有爾復不爲主人辱太守

業與榕門親太守况住姑胥門紅闌舊里相比鄰楚人
失弓楚人得世閒木落定歸根他年竹嘯軒中訪鸞友
沈歸愚藏待
詔高齋硯落落殊翁照胥紐玉磬同時問故寮尙有

音塵無恙否撫今感昔愴我神絕憐八十四歲之老人
心長手軟細鐫刻豈期飛下橫山邨

邨文恭
公所居

兩承已是

麟鸞種何況凡鳥爲兒孫鳳兮爾不見按頭大元壁古
篆長生祝無極漢皇不守未央宮何論詞宗一塊石鳳
兮鳳兮爾德終不衰吾歌正不爲爾一石悲橫來

追和程春海先生橡繭十詠原韻

我亦念井田此世生已遲天與地商量遣蠶飼爾絲樹

是古時樹爲要今人爲急種莫窮待三年當見之

樹種

春寒四十五人繭暖窩裏人既忘其寒蛹亦醒思起蠶

事爭此關火力謹相視譬如胎教疎百病從之始

烘種

誰能妻不衣誰能兒不哺都仰蠶腹錢那避山中露得

不辛苦得即得神亦妒春山九十朝報君以紈素

春放蠶

君穀熟田中我蠶熟山顛熟時兩通易豐歉情相連晝

要秋日小夜須秋月娟天解人願從我腹定果然

秋放蠶

蠹蠹豈得已亦復因飢寒祇此萬頭蟲爾飽我則難繫

頭有排索繫足有機竿非我能陷子天教入其閒

歐蠹

筐載似緇負蠕蠕緣不禁後時要爾養肯謂恩勤深不

知家已移食飽眠於林蠶乎我誠苦待兒無此心移枝

同命蹈湯火吾憐蠶此時要爲世衣被不爾安得治所

求補生民可憫不在斯我觀古仁人用心如見其煮繭

今日機杼地舊時空破屋織師有手訣可授不可讀歲

織千萬端遠散侯甸服勸君毋作僞作僞天不穀上機

榘之用於古木薪實以阜一經發全能遂令窮郡飽辦

土劑利害草木乃皆寶敬告異邦君死法要活草利無筭

生爲窮陬民如未得父貲千方獲小利又索真苦兒堂

堂永不稅楔此三字楣不無桑宏羊詠言請深思永不稅

行至靜懷莊寄家

秋山送客影蕭蕭落拓吟魂不可招
邨店雨來天欲晚
行人方度杏花橋

鄉舉與燕上中丞賀耦庚

長齡

先生

文學無貴賤師弟有因緣當公領解日我始雙鬢懸
公名麗中外孺子心已箋時從鄉先達一問慶歷賢有
如泥憶雲何人識肫顙旌花照黔服草木增華鮮下士
懸勢分呼來侍之前呂鑿受薰浴始見韓門全手贈孳
經書謂我能終篇念白束髮來抱遺望古先意薄言鸚
鵡力遂忘其孱我朝盛明經諸老起接肩閩胡奮前菲
江戴持中權六經有實義大師非漢偏皇皇一代學足
破

諸子禪何言毋歛生得淑洙長傳千金學屠龍用志良
亦專但恐歲月逝蕪穢愁芳荃因公庶有就不致中道
捐又苦念窮蹇力削此腫卷白袍五千士詎少萬選錢
已分梟懸投竟呼魚與牽居然如巨鼈最鳳承羣仙鉤
楹預禮禮清簧閒朱絃國家作人意寓此賓之筵今日
所厚醴異時待敷宣豈其以筐篚慰爾窮青瑣念此自
慚顧中心如沸煎未舉怨時命實成人舍旃一朝落人
獲依然驕莠田不獨羞世士抑豈無懼焉科目正難稱
炊沙何足餽惟山見五岳惟水觀九川塵滴乞沾丐期
無負當年

完末場卷矮屋無聊成詩數十韻揭曉後因續
成之

我亦胡不足而必求科名名成得美仕豈遂貴此生十
年弃制蕪汗漫窺六經友串矣稱譽謂我手筆精安知
公等長真非余所能所以來試者亦復有至情父母兩
忠厚辛苦自夙嬰一編持授我望我有所成未盡無所
成而世以此輕因之忘顏厚自量非不明貴從老親眼
見此嬌子榮癡心有弋獲焉知非我丁獨歎少也苦精
力遂不撐四更赴轅門堊地眠營騰五更隨唱入階誤
東西行揩眼視達官蠕蠕動兩椽喜賴搜挾手按摩腰

股醒攜籃仗朋輩許賄親火兵拳卧半邊屋隔舍聞丁
丁黃簾自知晚蝸牛喜觀鐙夢醒見題紙細摩壓摺平
功令多於題關防映紅青文字如榨膏檠急膏亦傾卷
完自嗤笑此又蟲語冰安知上釣鮎突作掉尾鯨自視
此窮骨何讓稜等登歸去見兒女誇我頭銜增但愁世
上語高文真有靈又愁鄰舍翁故生分別驚寒檠照秋
館苦續號蟲聲同硯有良友謂柏容鑒此欣慨并難與外
人言果蠹於螟蛉

出門十五日初作詩黔陽郭外三首

近行十幾日祇如且暮閒遠行十幾日恍若不計年澄

澄澗溪流蕩蕩東去船寒風峭白日蕭條異山川高堂
一片地一刻數往還顏色隔千里忽然立我前倚蓬久
惆悵此意誰復憐入壘長歎息晚炊起寒煙

策名公家言其實止求食一飽甯必官吁嗟遠行役思
便自此歸輾轉不能得事非盡由己徒念山中石強歌
不成歡假卧不安席夢醒覓嬌兒觸手乃船壁我本箇
下人胡爲異方客身世難盡言去去自努力

記我出門時梅花繞茆亭攜兒壘石上吹笛使酒醒山
妻持鐙來大字寫縱橫妹女各袖扇爭書壓吾肱鬩
一宵事不知雞已鳴今朝梅樹下小卓當窗櫺寒日在

黃葉蕭蕭兒授經讀書究何用祇覺傷人情不學耕亦
得看我黔陽城

淑口晏起

想到莫知其處去睡成無可奈何來底綠水石亦煎爇
起對沙頭阿濫堆

下灘

前灘風雨來後灘風雨過灘灘若長舌我舟爲之唾岸
竹密走陣沙洲圓轉磨指梅呼速看著橘怪相左半語
落上巖已向灘脚聖榜師打懶槳篙律遵定課却見上
水船去速勝於我入舟將及旬歷此不計箇費日捉急

流險快膽欲懦灘頭心夜歸寫覓強伴和

觀上灘者

絳者尻益高詹諸鈍爬沙篙師跌臆熊又若曝肚蠅一
上復一上舟如緣邊蝦游游競尺寸終見舌勝牙哀哉
水不平民勞致堪嗟萬一纜中斷倒衝甯救邪念昔榜
銅水灘更多於麻裸挽冰雪底髀髀紅赧赧錐刀利能
幾不給半筋奢努力無陽船腰環猶可誇

泊雷尾

清浪灘
之脚

醉竈明朝感客思密縫衣已就煩按九溪三浪平安過
欲乞靈鴉報阿夔

度歲澧州寄山中四首

我行三十日至此醴水頭
客心念歲盡晚具稍使優
遙憐思子人對食雙淚流
勸毋莫淚流兒今飯澧州
大盤登鮎魚小盤鱸絲浮
湖鰕點雞子汾釀凝新甌
大勝毋家食菽菹閒脯脩
吁嗟兒亦父心事可自由
哽咽難再道弃置觀衾裯

弃置難弃置悲端滿天地
去年客羅山千里度除歲
所依爲至親親念亦稍慰
今宵此一身計集幾雙淚
爐邊有耶孃鐙畔多姊妹
心心有遠人強歡總無味
憶在十載前舊事已酸鼻
老懷况愈慈如何淡此際
無名親戚

悲名得又反累得失俱可憐傷哉功名事

卯卯今夕樂樂到不可名不解憶郎罷但知燒粉蒸守
歲強不卧喧攪至五更班班稍解事鍼縷亦略能頭試
活菘花安排拜新正章章小而嬌其舌甘若飴亦知歲
已盡向毋索珠嬰阿耶十年來慈祥喜淵明青袍誤愚
我殘鐙澧州城安得與爾輩叫躍如沸羹今日趁么回
鄉俗以除日
集市爲么場假面可市曾卯須張飛胡章也稱鶻鶻還
應篋黃竹預辦鰕鱉鐙他年若命來似耶今遠行此樂
便難得徒令涕縱橫愁思無可寄笑調聲淚并

爆竹聲已銷鄰舍亦罷博把盃念吾生飛鳥究何託姿

年逝將老精力堊銷鑠學宦亦良策山林固予樂誠恐
爲俗牽遂令一生閤如今倘便決求田事耕鑿盡力得
逢年或勝虛俸薄何必父母身持受達官虐弟輩不更
事望我踐纍若焉知妻妾羞百倍衣食惡且當練勤儉
晚食而早作

樊城感舊

巳下戊戌

憶我丙戌年春風三月時駐馬樊仲國渡江恣盤嬉背
載雙葫蘆笑殺襄陽兒興到卽野飲菜花迷大隄尋碑
萬山頂訪古習郁池曉撥鹿門去晚度檀溪歸落日三
板船快瀉青琉璃蒼蒼漁梁渡餘映依山陂同袍兩三

人今或宰木爨當年仲宣樓爲我作生期城頭一揮筆
頃刻千字詩瓠落祇無用成就蒼髯鬣風雪滿天地江
山寂如遺殘燦照顏色小火不上衣豈獨倦游意傷懷
空自知

新野上元

乘駟趨新野挑鐙作上元風聲和鐸隱月色帶塵昏簫
鼓中州樂騰囊蜀客魂夜深無意緒岑寂引孤樽

博望乘月赴裕州

一星長伴月百里悄驅車獨歷羣動表如游天地初霜
巖鬚暗冰夢碎膽時虛弟輩鐙紅底還應倦讀書

經葉縣光武廟

閨盡真人起共除舊物歸漢京
天再正高廟日同輝業
憶昆陽肇軍仍小沛微星辰
臨虎鬥風雨助龍飛異代
驚雄烈荒煙認故圍君臣還
寢殿英爽壯斜暉

莫五題壁有不若弄書學劍揚旗
萬里封侯句

因和

就外論似不爾如君言亦復佳
便脫牛刀相贈待看馬
革歸來

過新鄭

曠莽平原煙樹昏大河東影接遙邨
天清馬度芑驄道

日落烏盤桔枳門促促封輶迷歲月駢駢行李老乾坤
三年兩食漆頭店壁上猶餘舊墨痕

出鄭州

終古此深轍長垣似古壕艱難鄭州道百里向成皋峽
窄沙無外車安馬倍勞耕人在天上奔走媿吾曹

渡河

山勢盡回秦塞外河聲直走汴城東長菱積岸連天黑
旭日登艫殷地紅歎息中原半財賦消磨歷代幾程功
平成未信煩薪土獨倚檣竿望去鴻

比干墓下作

并序

王子於受辛爲叔父當日必有類伊周所爲者獨夫至剖其心其不悟而痛銜之可想矣周武立殷後見書傳尙十餘氏於王子僅封其墓覆巢之下殆無完卵乎

王子骨肉閒力欲醒天夢封墓不及後孥戮知已縱公巨豈異人三笞得賢誦同聖不同福千載有餘痛

過黃梁祠

烏帽黃塵正月尾曉風晴日呂仙祠車中一覺還山夢正及邨前餅熟時

沙河縣

女牆沙上見此處認沙河落日城猶白迴風野自波路
埋山脚展地走樹頭科羸馬當深轍飢疲奈若何

夜趨邢臺

騶兒苦讓貪朝卧否至邢臺日未斜等是征程何必晝
即投宿處總非家得休便醉姬苴國不到拚眠孟祖車
事事關天隨所去前途休問馬休撻

大風宿滹沱南岸

去年今日天南頭諸弟餞余昆明海上大觀樓海天風
晴滿楊柳百花齊上樓頭酒弱弟牽衣不放歸我道剛
歲重來游此池豈知今日遠辭家黃塵塞天不能車滹

沱河邊晚呼飯鼻孔封泥沙滿牙舊事淒涼萬餘里酒
酣斫地舞刀起鎧光屋氣皆沙塵綠水青山思殺人

夜趨安肅

寒宵默默臥車茵苦念江皋已仲春怡夢家來忽驚醒
正聞犬吠尙疑真十年不作科名想一墮仍爲牛馬身
鐵遂銅門空露草月中懷往暗傷神

到京即病稍閒偶成

病裏潛消滿面沙欲書一紙寄天涯躊躇已近春三月
却恐身先信到家

病中絕句二首

莫五璃廠回又回璃廠路似看衙書鼠寂寂來復去
安排六箇月償足二萬里已過春中閒看看到糗子

得雪樓舅新平書

相望南北半周天此紙何由到眼前出處祇今並難道
眞花薊樹滿愁煙

思親操

人言讀書成名可以顯親我未見爲有益而徒累人自
臘初之俶駕倏榆火之已新高堂老淚日不知其幾落
鮮衣游子尙自得乎京塵撫暮春兮遠道寫思親之悲
操春田短短兮秧鉞曬水下比烏牛兮旁隨犢子晨舍

炊兮碧煙將以飯兮餉田摘蠶豆而淪薑菁兮起焉早
兮不聞我何爲兮安飽於此都也曰將貢舉而得美官
噫吁嗟兮吾官何處轉蘆溝之水兮曾不一度奪滄漣
兮治我車馬謂倖抱關兮取償於下揆道義已非仁粟
兮矧盜攘莫我肯爲魚銜索其將蠹兮而猶曰待取江
之水也舐虛空已羣笑兮而猶潭潭乎謂有味也朝以
思胡來此萬里兮暮中惑而不自知謂識字爲其誤兮
世何得羣哲之鬼鬼貌妍醜各有所好兮曾何若華者
貴而鹽嫖之妃不度德而量時兮苟徇人無以持車敗
馬欲其孰怨兮及迷未遠尙徒步而復之亂曰目極桂

樹兮翠一山蔚蔥畦兮在溪之干他家有子兮樂團樂
朝出耕兮夕以還乃獨在余兮哽不可言

武陵值盛漲

武陵大如馬江水日益漲夕艤柳樹下朝卧柳梢上不
知何處雨滙此駕天浪九江成一家蛟龍隨牧放大聲
天地迴勢欲無湖廣吁嗟乎生民何以爲俯仰聚族依
寸隄亦或藉尺舫秧蔬埋沙底熟麥奉魚餉漲退亦已
難况爾氣方張憶自公安來强半水逼吭於時未橫濫
吾已爲色愴上流今如此彼窳復何望天意殊蒼茫聊
爲記災狀

候漲退

朝看水縮寸暮看水縮寸不知高幾丈何日見漲盡篙
槳了無策趁風即稍進或數里而舍或數里而信游子
歎緩程長年怨徒飯青天白日中寂寂一船頓憎聽子
規啼厭看下舟迅岸樹盡相熟枝葉無一紊入蓬壑未
定又出驗水印明知不能纜却怪舫師鈍舫師益氣塞
指水但增恨舊時至武陵視家真覺近茲難如上天堊
令行李困人事非所料於此悟時運

早起上橫石灘

少小慣游歷將老自憂恐睡醒不及晨聽水識灘詢披

衣墜橋下斗怒可勝悚投碓轟風霆撞空走坡壠此下
有橫石舊聞似門踵自古鑿不開天意存罪寵命窮多
所妨庸必神汝重常憂見毋近一瞰喪前勇柁師正足
恃目定膽不聳爭舟出凶濤猶懦諸繹甬在我已堪喜
心如解桎梏

巢經巢詩集卷第四

巢經巢詩集卷第五

遵義 鄭 珍 子尹

古今詩共五十二首

月中於斗亭外結松竹梅為棚

已下戊戌

十十五五竹到亭與梅月下講縱橫長松聞之高興生
夜走出林來合并梅為梁竹為梯松枝化雲露生幄風
入松竹搖梅主人勸爾各一盃一盃一盃歌入神似聖
陰陰古潭春月光如筵落潭底滿身驚長黃金鱗停盃
起舞脫巾襪椶拂管牀淨於雪梁園渴客今倦游請暫
此中度炎熱

數盡郭東無限山嬌女定顰黃蕊外故人知醉竹溪間
親春老孟能相對輸與鬢翁新往還

樾峰次前韻以郡志稿重屬仍和道懷

孫作鉤羹待絮和高郵脩補費牽蘿舊志明萬歷壬子郡守與國孫敏政

創纂國朝康熙乙丑遵義知縣高郵陳瑄重修

圖昏樂得神君洗麻亂愁教

瞽女搓善後事宜終莫備李化龍平播善後疏未闕一條識箴名宿況

無多前輩陳公懷仁號識箴居士博諸掌故者天荒文獻堪愁絕空負黃雞

白日歌

窮年拮据不閒閒漫詡蓑衣與畫斑郡有蓑衣虎山地水豹見居易錄地

賴桑經求鱠部水須班志定狼山游心上下職方氏搔

首西南天地間寄語邦人莫金玉懷鉛相待餽芻還

次韻寄張子佩威寧

阻雨不能去默默手拄頰慨然念美人遠在八仙海平生兄弟間爾能不受給短小清瘦姿一忤去若浼昨別當仲秋今又斗建亥如何不思爾入夢夜每每聞得賢主人不以寒士待人生但如此作客亦未猥欲識吾何為言之增磊塊天生可憎面未語先得罪惟爾能我知散木究何瘕比來平播州禮士即自隗呼掃聽鶯軒郡乘屬修改城東有莫五爲人不懼餒能來助搜討使我免疲殆茲事誠有成山川一生采勝維肩百鈞止覺戰

搗腿念為此邦士文獻當有在區區著書俸是豈所以
乃兩親喜俱存霜鬢白皚皚既媿無厚養又負日戲綵
巾已誦五經而年整七載我生信無用此輩鍾望倍庭
教苦不得才否聽主宰諸郎今若何花寶貴堪採尊慈
知益衰定省要無怠不飽亦可歸遠游恐易悔爾我此
則同一刻千金賄儻閒念過我書來先設醢

得玉屏簫二閒輒與方仲堅

疑

鳴之樾峰以詩

戲贈次韻和荅

履行或印足陸居或無屋淵明琴不絃長統氣爲軸但
得此簫趣何勞問其目飽吹蒸成菌餓吹口生竹我誠

非瞽矇自無論聲曲方翁有緣習老去懷弄玉邇來漸
入調未免傷太樸手口止自贊古味何沕穆一聲魚出
聽兩聲雉登木瓦雀蹠蹠來何讓鳳凰逐不謂公亦賞
遇人似太淑由來天籟元不在五四六僧虔強解事標
別作技錄天地有大樂象德備鹽豉何當聽酺奏共歷
蕙厨肉

郡教授獨山莫猶人

與儔

先生七十六壽詩

靈光巍然傍橫宮獨見老輩之遺風鎮世衣冠蕩擗盡
我從先生聞始終石君偉人古名相稚存曉嵐眞學宗
祇今不獨少此老見者亦止三數公春海丈人在南嶽

昔年剪燭譚羣雄，恨我不見王懷祖。復不及覩覃溪翁，
爲余生晚再三歎。春海又化吾真窮，先生舊是王吉士。
曾拜諸老當乾隆，史公不稱牛走物。孔子廟堂甯鞠躬，
陽五已作古人視。不知鼻息猶如龍，時時攜我說前哲。
文章品業氣勃蓬，使我眉間有生氣。造次欲捕天馬踪，
世人解艷大官耳。安知此道非窮通，先生阿五南國雪。
帝遣娛老排寒冬，他時才大恐難用。願此趨庭神已充，
天意要畱顯慶輅。外人甯易稱谿工，請發狂言侑大斗。
不慚寸筵撞洪鐘。

得子佩訊及詩，仍次韻寄荅，兼託借書周執庵。

廷授
觀察時仁懷溫水賊已平

得君臘八書失喜幾落顏司命已上天歲去亦歸海客
子尙累毋倚門犬屢給挑鐙聖愁蹙心思積塵浼一紙
當面談悶破時正亥如何卽來爾爲吐所懷每我又如
何來慰爾在家待道里誠不遠得免牽眾猥後會真茫
茫離合任萍塊吾儕略識字此已得天罪再不令窮愁
墓木已就癩人生天地間一塵集大隗賢愚同盡耳精
氣有不改儻能挾日月正不問飽餒勉哉各努力出處
期莫殆狐鼠敢跳梁妖氛蔽山采喫足太平飯自厭腹
壓腿可憐一炬火泉通究何在以卵擊泰山思之何苦

乃歲尾四清夸虎皮包霜皚臘鼓打鼕鼕鮮鮮粲新綵
吾始樂安土理業待闕載地道非素學亦求古不倍水
石畱其真何由似王宰爾又不余助更誰補撫採向聞
周使君藏弄世不怠前忘乞書目過後乃大悔端公借
圖經千古重仁賄族庖不治久勺藥待鄰醢

愁苦又一歲贈邵亭

愁苦又一歲何時開我懷欲死不得死欲生無一佳大
雪滿中夜曉來四望迷當當滴破榻雷聲繞檐階悽切
結中腸事事憎慨欲生本乞者相強命金闈才徒然止
自苦何益於所為今年正月朔旅發澧水湄沿道樂歲

首兒女粲紅衣彼時吾與汝凍面兩相隨暮求飯店宿
朝食風棚糜徒看人婦子各自媚其私相携過大江宜
城行可哀寒風劒刀劒吹僵如輿尸黃黃塵洞中見舍
盡掩扉喉中默念死心暖僅一絲卅里小河口主人眞
賢哉呼門卽開門延客至中閨盆弦堊少婦其火良亦
微裙邊早屈手何暇避嫌疑至今尙感激可謂襄陽者
明日勢必去稍喜寒易支易驢漢水上驢劣又難騎雪
花大如蝶片片飛上睂爾驢善曉語十里九爾祈回頭
看兩筍雙丁連將之路人詫見怪裊裊過習池塗窮事
乃絕欲哭轉自哈過此篋而車春暖冰漸漸艱辛四十

傳塵垢至京師外極行路難內極慈母悲隨人攜柳籃
試罷精更瘦日日琉璃廠爛紙縱所窺熱處不解就嘲
罵理亦宜一朝敕放歸火牌去若飛載書出國門麥苗
綠正肥回望太和殿念此萬里來螻蟻何足道衝風爲
我悽塵漲蘆溝橋麥帽堆斗泥步至長新店憊極聖道
歧相看似土偶欲笑口不開含沙宿良鄉自此晝夜馳
四更清風店街閉苦重飢鐙擔來豆乳授客長銅匙柳
根快數椀味絕今尙思夢夢到樊口驛以舟當差危乎
渚宮下浪駭天忽迷小舟八尺長中流隨簸簸魚鼈逐
到岸鬼活魂暗啼南行雜水陸遂至鼎山涯望家廿日

程艤舟謝緒祠謂言拜家慶可及角黍期安知鎮遠水
頃刻上俾倪洞庭大於天蛟龍恣盤嬉流尸宿船底淹
戶守寸隄十日斲舟行岸聲但走雷伏蓬米漸竭何問
鹽與齋延緣至辰陽囊底看盡資爾遂食兩驛余溯銅
仁溪歸來喜俱存兄弟亦怡怡萬里問何得笑指書幾
堆飛鳥幸息翼但願粥與鮭朝暮倚親側又可事纂批
豈不賢餽空徒苦脚板皮好事賢郡守乃念地乘非經
百六十年山川當發揮文獻向來缺侗也實無知願以
一日長主持爾見推能如驂之靳搜剔力不遺舊稿無
一備作者頭腦乖每每對之歎不足爲光輝意欲與導

源人卑言易卑終思竟此業匪望千秋垂使識漢郡縣
不與苗疆儕自盡後死責職競由人譏狼星射東井羽
檄忽紛披遣發兩省兵辦此一山龜龜巢不易拔兩月
老我師遠者思逃亡近者多化離當食每不飽夢中半
鼓鼙愁來但看劒恨不碎其肢那能更修文日夕念仁
綦仡仡平太守一火殲厥魁手提血髑髏擲向妖穴灰
凱還笳鼓競正值鞭春時父老各色喜前時命如雞心
懸今始落歲去已莫追邨邨買年事闕闕紛滿街余亦
獨何心不歸對母妻鶯軒嗒然墮一一入所思計來爾
猶愈歲晚依南陔養餘復有事顧弄雙孀孩我誠自尋

苦天濶誰必羈命也未如何遣悲遂成詩

山陰江丹輪

延桂

從溫水回正月初六夜與大

醉雷雨

中 巳下 巳亥

老丹倚甕突兀解罵人爾誠不負此酒之功臣從軍事
事過終始如何功盡誰氏子吁嗟世事止如此世事止
如此呼奴添酒來吾與老丹再飲三百盃人間至真獨
此物得失不上糟邱臺君不見南山之南北山北枝頭
白蟻爭電輝小蟲欺天必雷責一擊可惜梁棟材吁嗟
乎老丹但唱將進酒莫歌行路難我有百鍊劍醉中突
拔與爾看斑斑舊染狗子血今日遇虎亦嬾殺倚向牀

頭思食人有捉卧喪請至門

寄楊子春

華本弟

臘月寄詩來正月未點評老懶殊可悲起予我何幸春
陰池上問盃底徧諸詠菲衙與菱角見爾鶩學競逸事
能告我發匿出親追客茲一月來念爾心屢騁郡方誰
嗣歌纂輯想難更逝將歸竹溪重尋魚鳥盟昨擬過爾
游及此花草盛而今又不能世事本難柄騎驢儻不迂
春城待合并

鈔東野詩畢書後二首

東野力可韓驚驚奏苦彈經巢能得書得恐無我觀草

草略可識十卷亦完完與待購善編一字不及看孰若
孟爲孟尙抗韓之韓始知作者心千載同肺肝

峭性無溫容酸情無歡蹤性情一華岳吐出蓮花峰草
木無餘生高寒見巍宗我敬貞曜詩我悲貞曜翁長安
千萬花世事難與同一日卽看盡明日安不窮貞曜如
有聞所然囚出籠

病夜聽雨不寐示諸生四首

窮人乃富骨春服三重綿一刻偶不戒遂爲風所緣故
知終日間違已卽生患老氏云無身此語或未然
未病時倦作病中念徒多可動尙如此或死將奈何所

以貴有我手足豈得過靜言思百年已往悔復那
春雨如有情隔檐一夕語病骨負爾多不共耕者苦
日我山前泥漿滿黃牯呻吟亦良慰卧看餽燈鼠
我年二十時終歲不識牀對書見日落忽復窗已光今
日萬不如望看汝輩強奈何惜筋力徬徬而洋洋

桃花二首

佳人一別一歲餘遣二茅龍爲致書古宅嵩陽渠好在
東溪明月近何如未知前面路猶幾止覺今年頭易梳
寒食清明將到了可來共喫桃花魚

桃花李花歷亂開一日吟此一萬回燕子不情竟無信

黃鶯無故亦不來時時清晝對此酌兀兀醉眼臨高臺
錦繡山川想仙去茂陵劉郎眞蠢才

次韻春感二首

杜陵四十畝黃柑興到擲在灤西潭此老窮餘尙濶壯
天公笑絕倒東南蟲魚爾雅嗟何用龍象空王不可參
閒把春情愚玉女百花齊向樹頭簪

春物昌昌徧九州逍遙好共太虛游多情世到玉溪別
說恨天教小杜優藥院晴絲空有影蓉城花霧竟無謀
生憎鄰舍閒歌管未中思量儘不收

寒食游桃源洞至湘山寺醉歌

桃源洞旁滿桃花春風吹嘶犁耨簫聲引入綠溪處
桃花泥人且須住太白高樓鶯亂鳴太白何年此聽鶯
一世餐霞美雲海飄零綠杖隨風鐙引益到口戒遲緩
已覺落花多幾瓣有酒莫澆黃面兒有錢莫繡阿羅漢
生前自苦皺兩眉此人死後徒呻歎君不見繞郭重重
萬土饅頭拄人脚脚拄肩兒孫即醅一樽酒欲視無光
語無口百年手足得自如不解運動已太愚手可以提
酒一壺足可以向花林趨好山好日不用一錢買送到
眼中皆畫圖天公辦此亦費力無人消受真成虛洞天
福地孤老之院耳幾人雞犬同妻孥鸚鵡鷓鴣看將夕

更銜一盃來侑吾一盃一盃吾不識湘山之路矣青巖
白鹿歸來乎

重醉湘山寺歌

湘山樹逾碧人又老七日若復不快飲此日真可惜晴
風吹皺白練裙春樹翻盃搖綠雲流鶯啼到最深處落

花如雨吹續紛座中頭白念臺孫

山陰劉澤山咸念臺先生裔孫道光二年

奉神牌從祀西廡者

引滿導我不厭貧怪我六十胡爲爾似借一

醉泯悲喜掀鬚棖觸風火腸仰天四顧心茫茫當年餓
死念臺老眼底兒孫亦枯槁稚存哭出玉門關何用小

書挂鴻爪

寺壁有洪北江小篆

談經講學僅寫意不及飲酒終日

醉醉生醉熟總可憐心中了了無一事湘之山何蔥蔥
湘波彌縣草茸茸醉看美人戲其中纖髻曳煙腰若風
相逢欲問海深淺打頭忽唾青芙蓉是兒狡獪未全消
老子欲眠亦嬾招山花笑領經巢意右丞雪裏畫芭蕉

春盡日

綠荷扶夏出嫩立如嬰兒春風欲捨去盡日抱之吹對
此傷我心淚下如縷縻天豈欲我強天豈欲我衰日月
自見多大化誰能持闌邊秃尾雀摧老看眾嬉微物亦
有然聊復酒一卮

送方仲堅歸金陵

江南一白鷗飛入古郎州止同林鶴語不共野雞游見
君恨晚送君早傷歌雜組岡頭草對盃搔首話歸難歸
去真難終較好余亦平生江海人五技空成不養身眼
前事事看不得又欲買山長閉門起我舞爲君歌天非
我作當奈何罷君吟飲我酒金在爐中莫開口而今卿
相不揖客顏回餓死溝中擲而今英雄不讀書官貴都
乘孔子車丈夫無福亦隨命誰暇回頭顧破甑倦來真
不耐王前咄咄童兒要人敬君今歸卧鍾山側放鶴岡
存三畝宅童冠偕風詠以歸老妻共按兒承色如此人
生計亦得酒酣攜手上高臺日脚紅邊吳楚開蒼煙莽

莽浩無際千巖杜宇聲聲哀垂鞭明日此中去何處相
思頭重回他年打槩五湖水月明記訪三山街舉盃便
此各萬里雲遠天長歸去來

題黔西孝廉史邁洲

勝書

六弟秋銓畫荻圖

水東之禾水西邁學古今黔並倉白

清鎮戴孝廉粟珍字禾莊與邁洲並

治經爲詩古文

敬爾尊慈有義方業成出自鬻紗力畫荻辛勤

那可言不待圖窮淚橫臆平生我亦頑鈍兒家貧讀書
仰母慈看此寒鐙照秋卷却憶當年庭下時蟲聲滿地
月在牖紡車鳴露經在手以我三句兩句書累母四更
五更守長成無力慰苦心頭白待哺仁人林爾今才氣

猛如虎往取將相壽賢母莫似老荒止作筮

夏山飲酒雜詩十二首

尺五疎櫺對圃開豆藤瓜葉舞青來羣雛翮罷須臾靜
風度瓶花墜酒盃

薺花爲落竹爲牆宿雨開晴苔氣香角黍新包蔗霜白

歸人喜過大端陽

鄉俗以五月十五爲大端陽

盃邊雲去向南天忽覺頽身落我前在家止說窮難住

別去思量倍可憐

子行弟時客滇

高柳陰籠打稻場白芙綠節舊池塘十年故事無人記
獨對黃雞啄夕陽

鳧雛鴨鴨烏鴉鴉小醉梅西林影斜
椶葉不搖風日靜
細黃一椀茴香花

自笑中年思種樹兒餐梅杏屬畱人
先生癡處常勝巧
屈指前頭過去身

月住風停澄道心
四山蟲語一鐙溪
山妻絕勝劉家婦
手暖沙瓶喚女斟

容易半月田園居
故人家近往來疎
耳根極欲常清淨
閒浪而今亦不如

嬌女嬰嬰雙秀脣
見耶解笑亂拈髭
長吟星盡四高句
不是伯休林卧時

蛺蝶蜻蜓相替來賞心無過手中盃我山已買半年事
試問先生到幾回

三年思汝歸談笑載酒依然舊學生看我形容先好變

不應道貌殺心情

黎仲咸表弟
初自滇歸

累篋連櫺拄屋高少時終歲借鴟勞買書不是讀書日
笑語阿知便汝曹

書外祖黎靜圃府君讀書秋樹根圖後

未作令先朝絕舖誦經琅琅導生徒手探祿橐顧兒笑

十載東修吾豈無抱經盃別范樓去

長山縣懷范樓
金人建見齊乘

白

頭不妙公府趨書之報我亦已厚在昔且自持經鉏

公居

名鉏
經堂
後來莫忘稽古力
老人雖老猶讀書
我及見公返
山廬道氣彌滿八尺軀
綠袍赤杖想神度
記擲竹馬時
相扶欲問當時讀
何籍惟見卧起通鑑俱
堂堂大部數
往復精力不減
洪景盧媿我一條不相似
孺筆要汗秋
樹圖正恐後生昧
來歷視作老輩真
閒居更須爲貌負
米像夕陽古木同蕭疎

秋感

渾渾河中水
罔罔河中月
三宿亦濡滯
尹士茲不悅
巧雀巢苕葦
作計誠太拙
蜩鸞焉不笑
榆枋固超越
嗟爾戀芳蝶
疎花已纖屑
芳意能幾何
物情乃難說

同莫五黎仲咸

兆熙

溯藻米溪度青山出梳子

岡得詩四首

澗道出厓角忽逢嘉樹林倚杖落紅葉呼兒此焉斟茲
地十載前攜卷時孤尋古木應不識鬚髯長似今

水盡不逢人間閒子母牛見人奮兩耳齧草卧冢頭慨
彼永眠客誰來展荒邱吾儕行復然能無千歲憂

人言梳岡下舊著楊氏子此姓入明來忠孝異前軌骨
肉世魚醢爾家焉不毀事業不足追蒼蒼一溪水

草閒躍蚱蜢時有未收豆登高一以望眾皴何蒼秀秋
序已婪尾林菊不堪艷佳人爾何處相思滿襟袖

明日同柏容邵亭泛舟過禹門山還飲姑園

老去人事多所樂在襟帶向來濟勝具浪擲悔無賴東
里山水平當門此其最五弟入邨來食藿不我糲老櫟
又好事能令小船大秀才作遊戲方舟正無害水光青
竹間山影紅樹外招提上絕巒草木紛晚馥放言徒充
棟子餘所沾丐吾儒有奇邪何責彼狡獪老僧喜我醉
請書壓濤瀨爲攀千丈厓印我百年蛻兩孺盡葵栗催
歸蔭松蓋野人饗官具邛媵無已太公然登嶼羹此真
未前蔡明儻不吝晴上流可揚汰會禽石斑魚更與斫

新鱸

黃愛廬

樂之

郡守出所藏方正學文衡山董思

白黃石齋手書諸卷鑒別皆真跡也

香光松雪今已奴人得晉唐口中珠顏公爪甲桺公脚
究竟知渠掇到無漏痕折股日在世鴨頭裹鮓無時殊
唐人止學六朝筆宋人乃見倉頡初爾來學問等如此
心畫小技良區區斯道亦復具本末干羲萬獻同吸呼
方黃豈是鳴書人今觀文董亦不踰乃知紛紛寡人者
正聖胸無干卷儲田歌自古非田夫知書莫如不善書
因公發藏動溪喟暇當一一汗其跡

書黃石齋先生臨顏魯公書竹山聯句及告身

卷後二首

闕下完人已東廡尙畱餘墨得人驚斲碑橫肘憶恭亞

霹靂推車浩氣行

先生有私印曰闕下完人以坡公墨妙亭詩殘碣爲硯銘曰斲碑親從霹

靂推車過先生句也

太傅衣鉢詎容贊魯公把筆焉過之巧仍十月廿三日却勝蒲陽齋戒時

十一月初四謁高巖李公廟

播州鎮山曰高巖李守宮之民有巖香火煮蒿一千載叟不敢唾兒不誦廿年好事願未到自誚覽目遺其凡朝來馬首欲南去忽遵東路似有摻仰空動魄釋轡下

直上十里汗浹衫牛腰白綬千古事誰見變相精削劊

此國當年机上肉賴公脫飽封豕饞賊鷄朝驚草兵走

惡馬夜晷天犬銜

張獻忠遣賊將李鶴子屠遵義至婁山見公空中刀甲揮叱之遂驚返吳

三桂偽國公馬寶登高巖廟欲拜像嫌像前塑白犬叱撤去是夜夢爲犬噬其足醒痛不已至今曾

孫繞巖下縲煙餉氣蒸和誠豈是詫愚令伏臘正要異

赫昭鉏芟摳衣再拜敢正視亦不敢請爲神監平生病

聖百事蠢眾弃獨取忘譏讒歲寒可念長病毋尙此絕

頂攀松杉側身東望去幾里得已不歸如此岳臨高感

念欲有記古僻畏汙泥一杖剩碑蝕碣畧摩誦暮鐘催

去愁颿颿

柏容檢詩稿見與

頗不思存稿其如勞者歌古人安可到兒輩或從阿聞
昔有佳處得之無意多更爲丁敬禮一一看如何

巢經巢詩集卷第五